

華

陽

集

華



華陽集卷十

宋

王

珪

撰

表

賀同天節表

伏以正陽旅月大夏御辰屬誕會之載臨浹羣情而並  
豫恭惟皇帝陛下躬禹勤儉憲堯聰明兵寄于農抗武  
威于萬里士成于學恢儒教于一時肆揚丕休夔出前  
古履乘離之首氣紀出震之盛期運感赤精茂漢風于  
六世慶逢華旦邁舜治于千齡臣等早被聖知功聯政



華陽集 卷一  
路效南山之善頌同四表之歡心

賀壽星見表

伏覩司天監狀今日日壽星出見者伏以金行貫敘灝  
氣肅于西成珠緯躔空祥輝麗乎南極瞻同幽溥慶屬  
熙明恭惟皇帝陛下紹寶歷之休握元樞之妙以仁惠  
育物而靡生不遂以誠德參天而靡感不通蓋象已兆  
于太平而物屢叢于嘉瑞爰察璣中之度載觀弧北之  
祥霄景澄夷乾文煜潤薦人君之壽旣稽元命之圖表  
天下之安又載西京之志宜新史牒以煥休符臣某冒

當軸之司乏調元之助徒懷盛際之遇永祝睿齡之昌  
伏乞宣付史館

賀老人星見表

伏覩司天監狀今日日老人星出見者伏以青煒御氣  
未臨春籥之分景緯騰精已直天弧之北德符象告瑞  
疊民瞻恭惟皇帝陛下治穆九皇武繩三后勤萬幾而  
載惕履衆美而勿休故化纔被而邦孚事適修而天答  
方察紫躔之度遽觀南極之祥靈氣發于先期駢芒燿  
于旣暮茲所以贊民風之奏延皇歷之遐雖嵩極萬壽



之呼河圖五老之告竊方盛際未煥珍符臣某等饗近  
清光參調元化識高穹之薦祉祈景祚之垂鴻伏乞宣  
付史館

賀冬至表

伏以五星起其初正天元之密度萬物萌乎始召卦氣  
于新陽光華聖時鼓舞羣動恭惟皇帝陛下馭民之功  
懋承天之意嚴幹獨化于大鈞斂羣福于皇極履至和  
之會方奉三微之端享無疆之休益隆萬世之業臣某  
等冒服宸寵參調鼎司慶盛際之親逢浹朝倫而同抃

又

伏以五星合于歷元大為天統之正一陽肇乎卦氣顯  
符君道之昌矧至睿之當期實萬祥之叢旦恭惟皇帝  
陛下躬秉聖德紹休烈光講禮樂之墜又慎刑罰之中  
憲儀如歲會適更新籥之和明若日升益固後天之壽  
臣某等饗榮禁路旅慶天庭歌雲爛之親逢會嶽聲而  
胥抃

又

伏以一陽襲管動律室之至龡五物書雲起候臺之嘉



應恭惟皇帝陛下如天之冒如日之升健德乾行幹四時之首氣至功神運新萬化于羣元方擁百靈之祥以應後天之祝畢慈聖三年之制雖餘歲之靡忘臨漢廷萬國之朝特盛儀之未舉臣等並塵昌會孤負明恩願述天心用保一人之慶重申民欲以承萬壽之休

又

伏以候黃鐘之宮萬物孳于律本攷太祖之歷五緯正于天元况臨復旦之華宜有踐長之慶恭惟皇帝陛下履大榮之勢經獨化之原享上帝之靈心恢百王之偉

迹乘日之至兆一氣于初陽如山之崇來萬年之景福臣某等並逢盛際過被明恩屬嘉序之載新率羣情而共抃

冬至賀皇太后表

伏以星連紫極氣動皇宮日景之長天表斯應恭惟皇太后殿下行符坤靜德協乾施保佑一人儀刑四海方履天正之序實均帝祚之休臣等蚤預邦榮並繫慈廕稱觴秘殿永同聖子之歡奏頌側門更盡羣工之祝

又



伏以祥飈啓旦愛景迎長氣滋律本之和運協天元之  
正恭惟皇太后殿下位隆太姒德冠有莘體仁施于坤  
元正母儀于天下屬載臨于嘉序宜丕擁于蕃釐臣某  
等蚤會昌期浸饗慈蔭羣工申頌率同四海之情聖子  
承顏常享萬年之壽

賀正旦表

伏以漢志所推三微重人統得天之正春秋不書一月  
大玉朔體元之端故日月光華開乎盛旦草木萌動被  
于太和觀治象之一新騰歡聲于無旣恭惟皇帝陛下

法禹勤儉追堯聰明廣子育以愛人參乾施而造物比  
念天時之偶未順民業之或未寧而焦勞感于宸心懇  
惻形于詔語至德以格上帝厚恩以賚多方頒新歷之  
元以合天地四時之極履上春之吉以來邦家萬福之  
宜臣某等逢辰休明荷國靈寵方迎祥于歲筦率會抃  
于朝班

又

伏以太史頒朔于國以首四時之和春秋書正次王以  
謹五始之會故教象浹日萬民之觀一新會同三朝四



海之圖並至禮叢上日慶浹中區恭惟皇帝陛下稽古  
聰明因天聽眎浸涵生以厚福監醇治于太清順春令  
則流寬大之書答天戒則儲恐懼之思一元更始正王  
道之大端萬祥來同啓邦基之長懋臣等親逢聖旦冒  
進王庭屬歲籥之載榮率朝紳而同抃

正旦賀皇太后表

伏以舜璣審度甫新一氣之和漢天受圖適履三朝之  
會祥開嘉序運屬昌辰恭惟皇太后陛下至仁象春厚  
德宜物保真人之炎祚正天下之母儀萬乘承歡長享

東朝之養四時首化更迎上日之休臣等蚤點近班並  
繫慈蔭方歲華之肇啓率朝抃以同深

賀南郊禮成表

今月二十八日南郊禮畢者伏以奠玉告虔已嚴于郊  
報鳴鑾入蹕方慶于禮成歲蕤盛容鼓舞羣動恭惟皇  
帝陛下德躋邃古仁詡函生包九乾之粹剛蹈三后之  
謨烈兵偃民靖時登物蕃詔推茨以迎長卜就陽而拜  
貺夙戒容衛稽參典文迺齋紫闈於薦清廟加真聖之  
丕謚循先朝之舊章遂升泰壇以類上帝皇邸之設紫



煙之燔樂備而六變成禮交而百神格羣辟在位萬符發祥擁天之休與物均慶固已追孝之誠盡事神之志通太平之儀振古無讓臣等幸逢盛旦職忝侍祠瞻能事之畢修浹輿情而同抃

賀加上真宗皇帝徽號表

今月二十五日自大慶殿發冊寶赴太廟加上真宗皇帝謚號禮畢者格清廟之靈方騰于丕稱先至日之吉蓋重于常儀慶流本朝孝錫萬類伏思先皇帝右文下武而臨邦家茂烈休光而承祖考追迹三代垂鴻億年

若受天元符稽古明訓兵革戢于二紀晏然有成功之隆封禪告于東巡穆然有饗德之意至神邈而如在衆美具而未衷斯固絜三靈之歡系兆人之望豈容盛日未講茲文恭惟皇帝陛下繼治大明永懷罔極怵惕中夜丁寧有司博士傳經以稽求于事典弼臣奉冊以對越于明威適嚴郊報之秋庸廣孝思之慕所以追崇之禮厚配享之道隆萬福一新洪圖更茂臣等率百辟之助敢竭于至誠有不世之榮獲觀于盛際聲名所接抃蹈皆同



賀冊貴妃張氏表

今月三日文德殿發冊貴妃禮畢者伏以國風之始蓋推厚于人倫君德之明亦參祈于內助故命妃之制上憲于紫躔告廷之華圖永于徽冊伏惟皇帝陛下懷天地之祐格祖宗之靈以寧紹于家邦以延鴻于基緒再維廟享之奉乃眷掖英之宜飭婦順之修協數于風化無私謁之志永念于憂勤諏今日之協龜詔有司之發號服褕翟之飾以冠內外之儀詠螽斯之篇當協衆多之喻慶宜皇壺位亞坤闈臣某等早會聖期偕榮朝叙

觀上儀之畢舉罄多抃以來同

賀明堂禮成表

今月二十七日大享明堂禮畢者伏惟王者布政實嚴太室之居惟聖人享親莫隆上帝之配屬本朝之盛際講三代之闕儀涵濡太和鼓躍羣動恭惟皇帝陛下撫中天之運躬上聖之姿懷祖宗之靈霜露以之休惕事天地之重夙夜罔或怠違謂欽柴之祈數已見于郊廟而合宮之享獨未報于粢盛適涓季秋咸秩羣祀故已來諸福之物交三靈之歡既親事于几筵遂還御于親



闕渙發大號恩覃有生念人之孝則廣漏泉之封恤民  
之老則賜養年之具斯誠帝王之盛德邦家之鴻休臣  
某等生逢盛時晚綴嚴近聞舜韶之美既參百舞之儀  
登春臺之和更洽羣歡之至

賀皇帝痊復表

今月二十三日聖體康復御延和殿親見羣臣者伏以  
天下之務劇故神寢勞則爽和上帝之監微惟德至盛  
者保福方清躬之凝裕固萬姓之馳歡恭惟皇帝陛下  
拱黎庶之元擎權綱之會持已安之勢而益戒思未皇

之事而是圖尚意德刑靡中日焦勞而究民隱風雨未  
若時恐懼而答天心適履晦明之交稍違宵旰之嗇宗  
社所以擁右乾祇罔不顧懷喜勿藥而就寧錫無疆之  
來祉家邦粹靖日月休華五老之告帝符重見河圖之  
瑞南山之如聖壽永歌天保之章臣某等謨服朝知預  
裁時柄九宸之邃宜頤處于太清萬事之機願責勤于  
庶府瞻輪重陛鼓躍一心

皇帝賀皇太后過宮表

伏以人道本孝不可限天子之尊皇居作宮所以正母



儀之位涓辰移御浹宇均歡恭惟皇太后體坤載之方  
儷天飛之正杜私恩于外謁翼大治于先猷念我之生  
每盡劬勞之力逮夫有立實繁提訓之言顧肇及于纂  
承久未遑于營建適新華構用揭鴻名慕老氏之宗已  
敦風于慈寶思太任之聖更嗣德于徽音願享千齡之  
休永承四海之養興言非質惟竭孝心

皇后向氏賀南郊禮成表

伏以灌玉太宮欽祖宗之盛烈燔柴吉土報天地之大  
成屬在昌期式爲丕舉恭惟皇帝陛下德懋舜哲功過

禹勤肆肇纂于聖圖率躬施于能務從權制祀本循祖  
則之宜斂福在民具膺皇極之證妾蚤緣家閥獲侍宸  
尊承甫就于鴻儀激素傾之榮抱

皇后高氏賀南郊禮成表

伏以國家揆天正之元修郊見之事肆嚴禋之就緒孚  
渙號以均休一氣肇和羣倫胥慶恭惟皇帝陛下膺上  
靈之眷紹四聖之圖乘三歲之屢登合兩儀之大報璧  
玉華潔粢盛苾芬率百神之丕歆擁萬福而來下妾猥  
承天契獲正坤儀聞緝典之具修激柔衷之至抃



貴妃沈氏賀南郊禮成表

伏以國家順稽皇則肇舉元禋肆成大報之熙允浹羣生之豫恭惟皇帝陛下紹先王之累盛勤上古之難行休惕以見祖宗明察以事天地升紫營之燎迎穀旦之萬祥下丹闕之書霈綿區之大澤矧丁昌運實煥丕猷妾叨侍三朝老居別掖豈意微生之慕猶欣盛事之逢

越國長公主等賀南郊禮成表

伏以下歲集祥紀黃鐘之初籥因郊報本升紫燎之高煙禮盛昌辰慶交綿寓伏惟皇帝陛下體乾純粹協帝

欽明化窮異類而罔不億寧澤被涵生而罔不蕃殖來四海之助適親奉于嚴禋合三神之休遂渙孚于大號振古之美與天無窮兒蒙蔭僊支鍾慈皇室屬蠲成于熙典實馳拔于丹衷

楚國大長公主等賀南郊禮成表

伏以假廟致孝尊天報恩並交三神之歡丕冒四海之福恭惟皇帝陛下體乾覆之德若朝升之明因歲習之多祥適躬修于鴻祀見祖禰于八室合丘澤之一祠釐事備成羣元大慶兒參華天胄沐愛皇闡聽車蹕之初



還浹宮塗而共抃

皇后曹氏賀明堂禮成表

伏以陽館致禋誕修曠禮端闡孚號沛發鴻恩邦典備  
成人倫胥慶伏惟皇帝陛下化流垓極功迪邃初緝三  
代之彌文規九筵之閎制臨禩在廟以追孝養之心欽  
柴于天以達歲成之報上靈昭格萬祉來寧妾叨正坤  
儀協敷宮教獲覩宗祈之就顧慙內助之勤均被靈釐  
舉深抃素

婕妤俞氏等賀明堂禮成表

伏以鴻覆之德非至虔不足上交孝思無窮非昭配不  
能自達於穆宗祀維時總章人祇普和海寓均慶伏惟  
皇帝陛下邇丕天之偉績迪至聖之全能乘涼露之感  
懷拜高穹之大貺玉帛薦潔粢盛報豐靈心顧歆協氣  
充塞妾等陶生盛世玷列後庭竊觀熙事之成共樂寵  
私之布

沂國公主等賀明堂禮成表

伏以涓路寢之室制總章之筵竝侑五精之嚴下勉諸  
侯之孝鴻儀就緒羣聽馳歡伏惟皇帝陛下紹累聖之



列光享三神之盛福念物蕃俗阜茲靈顧所以降休謂  
德大報微非親祠無以格意于是奠美玉于法席升紫  
煙于太虛告成精禋隨霈休澤見顧以弱質鍾于皇慈  
側聞清蹕之旋舉集柔衷之抃

冬節內中賀露香表

伏以萬物滋萌洊歷天施之統九清垂佑夙膺帝祚之  
休茲用祓祕寢之廷露寶薰之炷迎嘉祥于穀旦薦精  
志于上穹蘄與羣元永懷丕蔭

又

伏以流暑洊更初陽來復顧茂膺于丕歷思寅奉于大  
時薦信上園導和始旦庸保羣生之泰更如至日之長



華陽集卷十

華陽集卷十一

表

內中奏告立冬表

伏以四氣代遷盛德在水田收賦入民樂維時迎寒于  
郊國有常祀靈觀祚德庶格順祥

又

伏以景延圭下和襲緹中惟統氣于三微甫施生于萬  
彙臨祕殿之清夜露寶薰于大霄庶將蠲志之通式竚



繁釐之集

內中奏告冬至表

伏以天地之元陽施陰化羣物萌動嗣興歲功于時嘉  
休大被四極匪神之造曷以順宜竭誠致精尙或感格

南郊禮成奏謝內外諸神御殿表

天正之吉景氣晏休自宮徂郊稱秩元祀萬祥來下蒸  
被羣生繫保右之如克有就

明堂奏告內中諸神及在京宮觀表

伏以嚴烈考之配交上臺之歡迺涓路寢之居以倣合

宮之制乘秋季序秩古遺文敢薦至忱期導來祉

明堂禮成奏謝內外諸神御殿表

屬者酌皇祐之典奉合宮之祠嘉盛薦芳美樂象德誠  
孝孚盡休祥顯臻洵成曠儀實荷丕蔭

明堂禮成奏謝諸陵表

伏以九筵脩配萬玉相成孝盡人倫報明天道顧守鴻  
業洵稽闕文迨錫壽符舉欽靈睠

又

伏以紹綏寶圖躬緝大祭九秋蠲吉五室會精鴻儀釋



陳嘉應顯見惕懷先訓遂格曠文惟祚之休曷報之極

修神御殿權于觀文殿奉安祖宗御容表

伏以邦釁如去年陰載移式瞻列聖之祠將宅先皇之御既圖新于靈構爰庀事于嘉時愾慕如存式嚴遷告

天貺節內中謝露香表

伏以上真眷命丕迪于先猷嘉瑞著符洊臨于華節猥承洪緒祇奉前科是夕玉女來臚青童侍案關八素之秘字露七晨之返香伏願高通太清陰相寶祚監孚精志垂錫大禱

又

伏以炎暑徂威靈書告瑞表錫符于上帝爰紀節于嘉辰霽景澄虛寶薰露夕仰格九清之監永孚萬祚之休

又

伏以候隆炎律嶽薦珍符本祚德于昌期夙標名于令節就被丹除之地高通紫極之薰尙監涓衷益孚永佑

又

伏以圓穹胙德皇歷儲休循祖烈之重熙記節名于嘉候大廷初肅甲夜正清敢薦信于高晨願侈祥于昌會



天慶節內中謝露香表

伏以歲適開元月方成朏稽慶源于道祖發靈貺于真朝顧循眇躬膺被大統敢格肅忱之蘊終蒙保右之私

天祺節內中謝露香表

伏以天發珍符候臨嘉節仰企紫晨之境躬爇清夜之香儲思中虔逆釐下委追述先猷之奉永期丕祚之延

又

伏以寶歷擁時肇應帝衡之運靈符錫命夙昭祖烈之休顧嗣守于丕圖方仰循于前矩爰臨佳節更屬精衷

先天節內中謝露香表

伏以新秋薦涼甲夜臨霽肅肅祕殿寥寥太清燃芳上騰迎福下墮維高監德與衆承休

又

伏以孟秋初吉甲夜載涼太霄廓虛景緯澄霽躬燃寶炷仰達至誠欽靈監之昭回委鴻禧之穰簡願言烝庶同保壽康

又

伏以清秋冠序嘉節紀辰望雲景之杳冥度蘭煙之馥



郁至精馳越靈造感通願錫殊祥益隆永祚

又

伏以孟秋初吉甲夜新涼迹遺事于祖朝感下遊之真  
駕肆及眇躬之御益虔靈顧之承適履嘉辰更孚精意

又

伏以厥月孟秋維時中氣明發不寐亡如事存伏惟

諡

號皇帝威靈在天功烈被世瞻言僊御來止真祠及茲

搖落之辰實增悽愴之感奉承遺緒居極永懷

隆聖節內中謝露香表

伏以冬籥初寒夜庭未艾昔感飈遊之顧嘗膺神策之  
祥肆纂丕圖載臨嘉序企九清之玉景熾百和之蘭煙  
敢薦至忱庶孚永祐

又

伏以候應寒籥霄嚴寶除欽皇帝之肇祥感上靈之降  
治紀名佳節錫祚昌期爰洎纂承益虔薰奉

又

伏以寶祚之承緬憑僊系飈游之下顯著珍符紀靈跡  
于嘉辰凝異薰于祕殿伏願上清降監丕緒延鴻陶庶



物之阜成格九圍之休靖

乾元節內中謝露香表

顧以眇生之辰載履炎序承天丕命保又有邦側身寤  
興思答貺施靈薰之薦庶格至忱

乾元節內中奏謝祖宗表

臣以寡昧承基託于民上誕生之日感怵先猷昃食勞  
思懼失聖業在天沅祉以祐邦圖

乾元節內中奏謝章獻章懿章惠皇后表

伏以紫掖留慈報隆罔極炎煒御氣詳紀迺生永懷鞠

育之仁莫及青溫之養悼徽音之寢邈斬後祉之是延

皇帝祈福諸陵表

臣嗣守大器夙夜祇栗懼不足以承祖宗之聖業乃自  
春以來積勤違豫豈臨聽之不明災咎所緣而致哉惟  
靈心顧懷使保有大命以丕承于邦祀不亦宗社無窮  
之休

皇帝康復奏謝諸陵表

臣嗣守丕序不敢怠遑萬幾積勤至于違豫在天之監  
錫福以寧夙夜嚴祇益謹靈戒



南郊青城皇帝問太皇太后聖體表

臣某言尊桑聖之度見泰元之尊飭萬衛以徂郊候初陽而薦玉遽違信宿之侍重結晨昏之思寒律御辰嘉休相德

太廟皇帝問皇太后聖體表

臣某言茲者諏景至之吉肇國陽之禋乃飭齋輿先薦清廟竚蠲成于孝饗阻恭侍于慈闈適履祁寒仰綏純祉

奏告永定陵表

伏以盛德錫符夙啓休平之運皇圖接統長垂燕翼之謨恭惟諡號皇帝功格乾祇道包繩契恩留二紀永深遺御之思氣易中春還及上賓之旦申懷罔極致薦如存

奏告永定陵景靈宮慈德殿表

伏以守長世之基緬懷垂裕之訓愴流陰之遽還履邊音之辰恭惟諡號皇帝德厚同天仁深被物顧威神之如在保運祚以無疆施及眇躬獲承大統空極遺弓之奉何勝濡露之思



仁宗掩皇堂皇帝奏告表

伏以日月不居几筵如昨山川之勝陵邑旣新惕遵遺訓之書阻從大升之駕涓辰維吉復土卽期瞻法御以長違結孝思之罔極

皇太后奏告表

伏以萬邦在疚音遏舜庭七月戒辰陵開漢邑應龍岡之嘉兆掩玉劔于幽扃風蕭騷而四鳴日暝昧而西下上漢之遊莫返終天之恨何窮

初忌酌獻永昭陵表

伏以春籥正闌仙園何邈空留言于玉几已駐景于崑臺適及遺弓之辰靡勝濡露之感就陳嘉獻尙監哀悰  
奏告福寧殿景陵宮永昭陵表

伏以靈輿厭代已隔于僊游駒隙流陰忽臨于練祭恭惟諡號皇帝功烈被世威靈在天遺弓劔于橋山陳衣冠于漢廟爰歷上賓之旦何勝永慕之懷

又

伏以昊天之神雖懷欲報之心三歲而除敢越通喪之禮恭惟諡號皇帝宅靜淵之德躬神睿之資自仙馭之



升遐忽素冠之終制顧言未遠摧泣何勝

又

伏以白日賓空莫返乘雲之御暮春感節載臨邊樂之

辰恭惟

諡號

皇帝稽古凝猷參天布化輯九圍之至治

遺萬世之丕休永惟大統之承何極終憂之慕

永昭陵乾元節酌獻表

伏以白日賓天早促乘雲之御薰風紀節載追感露之  
祥撫玉几以悼心望柏城而賁涕敢陳芳薦庸達孝思

仁宗禫除奏告昭陵表

伏以三年之喪所不敢過閒月而禫及此而除雖哀變  
之從宜惟孺慕之如昨明靈猶在摧殞難勝

奏告英宗永厚陵表

伏以歲華易晚冬律又中馳愛景于層城結重冰于太  
液恭惟諡號皇帝早膺靈命歛厭神機漢寢朝寒疑玉  
衣之自舉驪宮夜永想金鴈之空飛載感流陰益深遙  
慕

正月旦起居仁宗永昭陵表

伏以淑氣回郊鮮飈動物履四時之首祚蒙萬國之嘉



休恭惟諡號皇帝聖德天臨神謀世賴橋山夜永空悲  
玉劍之沈漢殿春長猶憶椒觴之獻僊遊何在哀緒難  
任

正月旦起居仁宗永昭陵英宗永厚陵表

伏以窮陰謝節端月應辰破新萼于上林動輕漸于太  
液恭惟諡號皇帝睿謨經世靈德對天萬國貢珍不見  
涵元之會六龍奉駕莫攀闈苑之遊感嘉歲之載新望  
仙園而增慕

寒食節起居南京鴻慶宮等處神御殿表

伏以桐花初茂榆火載新瞻言仙馭之遊舊載名封之  
祀仰威神之不昧感時節之又遷惕奉遺謀永懷孝慕

又

伏以神榆更燧春露零虛瞻勝宇之雖遙奉靈遊而如  
在恭惟諡號皇帝陛下茂經邦業永繫民懷欵法御之  
賓空極遺仁之感物顧茲菲德嗣守丕圖惕惟先訓之  
承優若時思之慕

寒食節起居諸帝陵表

伏以桐華近節榆火變晨感景物于流年愴衣冠于遺



寢遐企御天之烈永詒垂世之謨施及眇躬嗣膺大器  
每伏孝思之惕敢虔時薦之芬

又

伏以華林遺景將修禊水之遊并土舊傳已舉藏烟之  
令恭惟 諡號 皇帝履中天之運詒萬世之謀人避軒臺

終若威神之在露零漢殿空深怵惕之思仙馭雖遐嘉  
觴或顧

寒食節起居諸后陵表

伏以春露零宵驚節物之變玉衣留御永悼徽音之

遐肆守丕圖邁遵慈訓屬桐華之俯候瞻羽駕以馳思

又

伏以淑律向闌感孝思之無極仙園在望愧祗謁以未  
遑永言遺訓之存施及眇躬之御嘉辰又至芳薦惟恭

六月旦起居仁宗永昭陵表

伏以氣應林鍾日躔東井候温風之始至感溽暑之將  
徂恭惟 諡號 皇帝仁澤具深光靈未遠神游安在邈四

海之所懷仙寢空成度百年而猶畏深維罔極永悼何  
勝



六月旦起居仁宗永昭陵英宗永厚陵表

伏以律中大林日臨東井被溫風于羣物徂畏暑于層  
空恭惟諡號皇帝皇躬儉勤聖德廣密露團金掌終成  
漢武之仙雲滿蒼梧莫返帝虞之道威容如昔慨慕何  
窮

七月旦起居仁宗永昭陵英宗永厚陵表

伏以蓐收御令夷則旋宮感涼風之動辰望流火之斂  
夕恭惟諡號皇帝積隆丕烈慎固成基萬務勞精終損  
文王之壽九清棲景莫追軒后之遊搖落驚年愴悽盈

抱

中元節起居南京鴻慶宮等處神御殿表

伏以音移商律景肅金行火殺芒以流空水凝氣而收  
野伏惟諡號皇帝功高濊古澤浸涵生瞻勝迹以雖存  
想遊神之何所適履夷傷之候載深悽愴之懷永念燕  
謀往虔嘉薦

中元節起居諸帝陵表

伏以方秋之初維月之望聽商聲于夷則校仙籍于元  
都恭惟諡號皇帝靈德在天燕謀垂世戎衣清難定業



當年羽仗賓空憇遊何所肆奉承于大統固覆被于遺  
仁載驚搖落之辰重發愴悽之慕

又

伏以斗建申中月躔枵次適及夷傷之候可勝悽愴之  
懷恭惟諡號皇帝垂業艱難詒謀燕翼軒臺弓劍葬在  
橋山漢廟衣冠游于複道興言冲眇嗣守平成顧秋序  
之甫初惟孝思之罔極

又

伏以清飈肅物大火流空乘西顛之素輝應中元之嘉

令恭惟

諡號

皇帝運膺炎歷德覆鴻區保漢鼎之安成  
萬世之基業起軒邱之畏著百年之威神顧歲景之貿  
遷悵宸遊之緬邈永循邦訓內怵時思

中元節起居諸后陵表

伏以素商肇新華月初滿望山陵之喬木當天地之肅  
辰伏惟諡號皇后位正坤儀道符乾極流徽音于來裔  
濟睿烈于當時興言眇躬嗣守鴻業適及戒寒之候何  
勝追養之思

又



伏以維斗建申其神執矩當陰靈之既望中商律之始  
 清恭惟諡號皇后沙麓鍾祥河洲播德早儼儀于乾極  
 奄淪耀于軒宮猥念非涼獲膺統序悼音塵之已邈增  
 悽愴之無窮

又

伏以方秋之初其月既望氣始肅而用事火西流而戒  
 寒伏惟諡號皇后配德純坤徽音具紀收神太素懿烈  
 如生屬霜降之在辰想飈遊之何所有懷明發罔極孝  
 思

中元節起居永昭陵慈聖光獻皇后表

伏以方秋厥初維月既望火流天而滌暑露霑卉以舒  
 芳恭惟諡號皇后功協聖謨德侔坤極仙遊不返感急  
 節之徂遷孺慕未忘瞻長陵而摧咽

八月旦起居仁宗永昭陵表

伏以維時仲秋厥月初吉飛上林之涼葉動伊水之寒  
 雲恭惟諡號皇帝澤被含生福流後裔龍輿御漢驚歲  
 月之屢遷玉座凝塵悵光靈之永隔每懷遺訓空積悲  
 悰



八月旦起居仁宗永昭陵英宗永厚陵表

伏以流陰易遷素律俄半涼風颯以荐至白露團而下

零恭惟諡號皇帝至德幾神休功澤世人心永慕終疑

蒼野之游天令空回邠及總章之御載驚搖落中積愴

悽

十月旦起居仁宗永昭陵表

伏以流陰變律寒氣凝辰風匝野而四鳴日臨圭而初

薄恭惟諡號皇帝仁深萬類謀燕後昆弓劍不留已掩

橋山之固衣冠猶在空陳渭水之遊冬序又新孝思無

處

十月旦起居諸帝陵表

伏以氣正上冬時維良月候北郊之初凜當萬物之畢

藏恭惟諡號皇帝凝命中天施功四海神機厭代早從

上漢之遊寶曆周年居極念親之感光靈如在悽愴何

窮

又

伏以場功初入關旅既來肇升一氣之嚴時告百嘉之

備恭惟諡號皇帝誕膺天命保有皇圖方聖德之澤民



忽神遊之厥代九清留景萬世垂謀適更寒籥之初益起寢園之慕

又

伏以氣薄水行景移冬陸愴衣冠之遺御怵霜露之時思恭惟諡號皇帝盛德參天至仁懷物雖游神于霄極固貽羨于蘿圖敢達至虔以修常薦

十月旦起居諸后陵表

伏以令主水行氣乘坎治國謹門閭之戒農登黍稷之儲恭惟諡號皇后秉坤順之儀儷乾剛之德音流彤管

慈訓猶存塵晦玉衣仙遊何在寒威忽變孝感無窮

又

伏以顓帝御辰應鍾合律度寒風于廣野馳愛日子層空恭惟諡號皇后助德先朝流光後裔神遊上僚久闕于椒闈歲景易遷幾周于玉歷肇膺皇序增惕孝思

又

伏以北陸凝陰游更于冬律九清留馭緬慕于仙遊恭惟諡號皇后德配乾行體儀坤載流徽音之雖邈導慈訓以如存敢達孝思用申時薦



十一月旦起居仁宗永昭陵表

伏以冬律又中神游何在動朔吹于石馬下申霜于玉除恭惟諡號皇帝謀翼世長仁霑物厚崦嵫日薄空勞夸父之蹤蒼野雲深莫返帝虞之駕撫節易感懷恩豈窮

冬節起居南京鴻慶宮等處神御殿表

伏以寶馭遊真爰宅神于勝境圭延晷業盍慶賀于嘉辰緬慕烈光惕增孝感冀敷靈祐丕衍皇圖

又

伏以一陽來復萬物滋萌驚歲序之又新奉衣冠之如昨恭惟諡號皇帝履炎靈之運恢皇極之符慶流子孫之不窮功齊天地之何泯適臨嘉節空積追懷

又

伏以流年屢遷嘉節環至律應黃鍾之本日迎南極之長恭惟諡號皇帝靈德在天睿謀垂世奉容衣于別寢悼遺劍于昔遊適臨天序之元空起邦情之慕

冬節起居諸帝陵表

伏以初陽襲管愛景延圭慶屬昭辰感深遺御恭惟諡



號皇帝功恢鴻緒澤浸涵生燕體在天詒謀非德敢因時薦庸格孝思

又

伏以歲律更端天元合統祥起五星之會氣滋萬彙之萌恭惟諡號皇帝乘運炎精握符帝極早游神于太素空留澤于涵生長至協辰永懷垂訓

又

伏以景延南極氣動黃宮亞輯玉于歲儀發書雲于朝誓恭惟諡號皇帝寶有神運大恢帝謨惕循眇德之承

純荷燕謀之及遵圖豈易感節何勝

冬節起居諸后陵表

伏以緹室驚和又新嘉節玉衣留御凌邈靈游恭惟號皇后稟坤體之柔配乾符之正儲休寶緒屬德眇躬緬慕慈徽惕申孝感

又

伏以窮陰受謝愛晷迎長驚寶燭之初融感芳芸之載馥恭惟諡號皇后體侔坤載德儷皇居塗山之賢早興有夏之治闕睢之化猶播在河之音嘉節又新先園永



悼

又

伏以漢歷推元已合連星之異洛圭定景初迎至日之  
長恭惟諡號皇后德正坤符體齊天極不返瑤臺之駕  
空留彤管之芳永念詒謀何勝感節

年節皇帝酌獻永昭陵表

伏以太簇還律青祇御郊來方貢之萬珍應農祥于東  
作恭惟諡號皇帝鴻名軼古遺澤被民下未央之庭追  
晨觴于昔獻望穀林之野感春露之初零皇訓是承孝

思何極

年節皇太后酌獻永昭陵表

伏以窮律收寒新陽發煦動年輝于廣殿變晨景于會  
林恭惟諡號皇帝早御聖圖夙勤天緯忽凝丹于軒鼎  
已駐節于崑丘載驚歲月之遷空結園陵之戀

年節起居宣祖永安陵太祖永昌陵太宗永熙陵  
真宗永定陵仁宗永昭陵英宗永厚陵表

伏以日躔虛次斗建寅初起歲事于東郊動春華于上  
苑恭惟諡號皇帝隆名蓋古厚澤加民萬國來庭猶想



獻珍之會五陵連陌空成拱木之陰夙荷遺謀內深馳  
惻

年節起居昭憲孝明孝惠孝章懿德明德淑德章  
獻章懿章惠章穆章懷皇后陵表

伏以蒼精告辰太簇中律銷嚴氣于冰井上榮光于露  
臺恭惟諡號皇后天合作祥陰儀處順仙山何所應陪

羽駕之游春日空長那復蠶宮之御適臨改歲倍積馳  
思

靈駕發引慰皇帝表

今月二十日扈從大行太皇太后靈駕發引者臣躬持  
使節祇奉靈輿辭觀闕以啓行僚郊扉而就次恭惟皇  
帝陛下受天至性執古達喪臨祖奠以長違積孝思之  
鉅痛願裁聖慕以應輿情臣伏恨總使在道不獲躬詣  
闕廷謹奉表稱慰以聞

靈駕發引慰皇太后表

今月二十日扈從大行太皇太后靈駕發引者伏以龍  
輶就祖天仗戒嚴甫辭禁闈之途已頓近郊之次恭惟  
皇太后殿下德宣慈範養極孝誠撫神座之初遷愴微



容之永隔願紆至慕以介純休臣伏恨總使在道不及躬詣內東門謹奉表稱慰以聞

寒食節慰皇帝表

伏以大行太皇太后靈駕下宮奄經寒食節者仙游不返春令載移感斷火之嘉辰留綴衣之遺御伏惟皇帝陛下逢時怵惕觸緒無窮驚氣節之又新愴音容之永隔攀號摧慕聖體難任臣伏恨祇事山陵不獲隨班詣西上閤門謹奉表稱慰以聞

寒食節慰皇太后表

伏以大行太皇太后靈駕在下宮奄經寒食節者天令荐更春華歛暮履藏烟之嘉節撫憑几之遺塵伏惟皇太后殿下永懷徽音內盡大孝瞻厥儀之旣邈痛羨路之將闐號慕摧傷聖情難處臣伏恨祇事山陵不獲隨班詣內東門謹奉表稱慰以聞

掩皇堂慰皇帝表

臣某等言今月十日太皇太后山陵掩皇堂禮畢者池荒振飾龜筮協謀掩金駕于重泉留玉衣于閒館三辰晦象率土摧心恭以太皇太后母儀三朝有邦家之一



德力援二帝有社稷之大勲自經屬引之辰肆舉就房  
之典耕不倚耒無踐雜田壘之傷馬皆服車無犇蹠溪  
山之恐嘉符衆見熙事丕成茲蓋皇帝陛下孝奏高穹  
精通幽壤鴈飛銀海雖闕景于千年龍繞青山終遺祥  
于百世臣等伏恨奉使在道不獲隨班犇詣西上閣門  
謹奉表稱慰以聞

掩皇堂慰太后表

臣某等言今月十日太皇太后山陵掩皇堂禮畢者筮  
宅之祥旣積封于甬窳安臣之享援精事于初虞愴極

慈宸涕零行路恭以太皇太后撥昇先帝定保今朝德  
盛而無所名恩闕而不可報何奄鍾于邦釁遽絕睇于  
天儀前諏先遠之期丕舉方中之事大升安步曾路塵  
之莫驚羨道長扁俄陵土之已復伏惟皇太后殿下欲  
養之心不逮思媚之志猶勤羽駕真游已會在天之聖  
龍盤厚壤終承卜世之祥臣等伏恨奉使在道不獲隨  
班詣內東門謹奉表稱慰以聞

請皇帝去杖經表

今月十七日慶壽宮西序奉慰伏覩皇帝尚躬重服臣



某等忝陪近侍獲奉清光適臨既禫之祥猶御始喪之服薦紳駭顧若無所容竊以日已就除可謂盡三年之報禮容順變所以通一時之權哀苟致于有餘過將同于不及大行太皇太后留仍几之命載易月之文如其尊行允曰追孝皇帝陛下奉喪情至予物仁深顧感時之無窮在聽政之已緩人心尚鬱邦務未昭況若苦廬豈不極孝孫之慕然存杖經非以合聖人之經伏望退抑至懷俯矜羣議勉迪祖宗之故典若稽天地之大中易衰從常用覆嘉告

華陽集卷十一



華陽集卷十一

表

謝兼端明殿學士表

宋

王

珪

撰

伏蒙聖恩授臣兼端明殿學士者外孚皇藻旣冒寵于  
禁林入奉清光更加榮于祕殿恩非常擬望出意涯伏  
念臣少起寒生夙陶盛化以孤童而就學承素業之傳  
家遠踵峻英之游徧階華顯之序嚴扃預召自驚一紀  
之遷從橐無言空點兩朝之遇加以介愚少與讒訾積



生南國分符惟望江湖之守西清仄席詎勝朝夕之咨  
敢謂皇帝陛下念學古之素勤記受遺之前事特下十  
行之札申諭至明使兼三俎之榮莫容固避雖曰濫賞  
豈不戴曲成之私猶能隕身庶幾盡一節之報

謝賜修實錄獎諭手詔表

伏奉手詔以近傳宣取索仁宗實錄二冊入內特賜獎  
諭者伏讀歎驚戰汗失次恭以仁宗皇帝享御天下四  
十二年豐功茂烈實配天地宜得遷固之材以論譔本  
末著之無窮先皇帝迺誤以臣等充詔而歲月淹晚未

克就緒伏遇皇帝陛下始初清明追悼文武方虞罪斥  
而特形手札之賜奎壁宸謨驚震羣視雖前世史官饗  
蒙獎遇未有若此之比也臣某等敢不夙夜研思趣成  
大典勉以稱陛下褒勵之意

謝參知政事表

伏奉制命特授臣依前官參知政事仍加食邑實封尋  
具表辭免蒙降批答不允仍斷來章者伏以誤奉褒章  
擢陪宰論寵生望外愧越情涯伏念臣早緣薄能得齒  
畷甲紉書天祿嘗進躡于並游視草玉堂空載驚于采



八年陰沔易績用尤疎專腐儒蟲篆之文豈堪謀國念  
平日江湖之思止欲退身間因對於清朝輒屢斬于閔  
地未遂懷章之去敢辭抱槩之勤不圖淵衷猶錄舊物  
方卽俊心之宅亦借政路之求矧親決萬幾之難力折  
百年之敝圖事揆策追前王之未能聚精會神索一德  
之同至豈容迂學獲廁近司雖固託于孤誠終莫還于  
渙命覲顏承詔鏤骨知恩茲蓋伏遇皇帝陛下鴻覆兼  
容大明獨照謂中書政事之本非務于近謀顧三朝侍  
從之臣惟矜于樸守臣敢不慎祇皇訓茂緝天功道在

修身將每宵而自惕義形報國視九死以猶生

謝尚書左僕射表

伏奉制命特授臣尚書僕射兼門下侍郎加食邑實封  
尋再具表辭免蒙降批答不允仍斷來章者伏以揚大  
廷之命躋上輔之班總治中臺兼官東省榮無他儼懼  
不自勝臣竊攷詩書之文概見君臣之際或懷材而志  
罔克顯或得位而時不足爲惟上下之相求實古今之  
鮮合邁茲絕會實在昌辰加官制之肇新偉帝功之不  
就正三省以出納王命之重分六卿以紀綱邦治之蕃



宜擢廊廟非常之賢以輔朝廷不世之業豈容非據能  
濟厥成如臣者間歷憂艱而學寢衰晚更寄屬而心輒  
始任重塗遠每懷顛躓之虞身老退遲已昧盈虛之數  
敢意褻言之下更饗異等之除避牘載陳俞言曲闕洎  
勉承于殊命顧何處于厚顏伏遇皇帝陛下大講闕文  
終憐舊物雖務精于名實亦過飾于陋愚且寵深則知  
命之爲輕位高則知責之愈重心其許國敢金石之少  
渝義切愛君惟股肱之一力誓堅白首之節仰答大圜  
之私

謝門下侍郎監修國史表

近奉制命除授銀青光祿大夫兼門下侍郎同中書門  
下平章事監修國史加食邑實封尋再具表辭免蒙降  
批答不允仍斷來章者伏以孝奏上園甫格神娛之祉  
恩先百辟亟頒庭渙之文方固避之靡俞第因榮而爲  
懼伏念臣識不足以勝物才不足以濟時被皇心之獨  
知當宰政之大務然而責深于持國是非之際怨積于  
背上好惡之流匪石一心曾未裨于涓壻頓車長道固  
已迫于桑榆會丕舉于宗祈饗更隆于褒進觀能受祿



誠可畏于人言審分辭盈竊自規于天理伏蒙皇帝陛下旁斥浮毀曲矜晚塵以立朝事主有四海之孤以圖事共政無萬死之惑使趣祇于迺服豈素望于茲時嚇鶴還止于桐梧樂鵠重陳于鐘鼓自惻衰殘之至何勝禮遇之優始以謀王敢道齊桓晉文之事終之格帝尙希伊陟臣扈之功

謝南郊加恩表

奉二精之報方錯事于崇丘獵三靈之流遂均釐于邇輔仰承嘉命俯惕孤衷伏念臣早會昌期進聞國論器

雖狹于所用志常勇于有爲屬修郊廟之祠叨預公卿之議鳴鐘在簾獲際靈旂之娛紆佩掃塗親承天步之恪曾乏秉文之助得觀繼聖之能逮敷錫于鴻休復過膺于寵數論非朝允恩實天隆茲蓋伏遇皇帝陛下文輯闕希仁漸疏逖因神推惠旣被蟲魚之豐爲己掠功何勝淵谷之畏尚勉殫于朴守期少謝于曲成

謝賜入伏早下表

伏蒙聖慈差入內侍省高班某傳宣三司入伏早下至末伏依舊者伏以炎煒貫叙適當祠伏之初詔驛傳音



俾遂退公之佚被寵至渥拊躬若驚伏念臣器稟孱微  
慶逢休盛侍帝殿之邃乏嘉猷之屢陳綜計廷之繁殆  
經費之鮮給然而金穀萬計夙宵一心方懷謫之寢深  
敢圖安而自便豈謂皇帝陛下愛均臣體慈發天衷載  
矜歎鬱之辰甫降深純之誨舉漢家之令特優出沐之  
期詠周人之詩敢歎在公之節永肩勤瘁上答生成

又

伏以上伏之辰載離于煩暑中發之詔有惻于庶司日  
遂公休舉銜聖寵伏念臣早緣懵學獲齒清時居乏先

容之階獨誤上知之厚晚輸忠瘁徧歷顯榮剽京兆之  
煩固政迹之無異綜大農之計幾心畫之曾殫然而職  
隆則謗所叢材鮮則事不給寒暑回薄敢思退食之安  
夙夜勤勞大懼曠官之謫豈謂皇帝陛下德深天地愛  
浹臣鄰軫炎籥之御時降使貂而申命蠲曹事之冗俾  
從少間之私竭公家之爲終盡一心之報

又

伏以夏籥之交甫會三庚之熾詔聲之發有矜庶府之  
煩退樂公休仰銜天寵伏念臣緣末學之進乏先容之



階早塵賢路之游遽竊禁林之侍奉藩宣于外茂治迹之布聞筦財利于中幾心計之殫盡然謗叢材薄責起任憂殆歲月之末功曾夙宵之敢肆伏蒙皇帝陛下至人裕物元化參天念時之暘則及人以恩閔職之勞則均人以逸舉漢儀之舊率遂早歸之期因庚制之頒更宏多暇之政臣珪敢不靜而經事居則圖庸一心在公之爲少疇自天之賜

謝太后撫問第一表

伏蒙聖慈以臣祇奉大行太皇太后靈駕在道特降中

使傳宣撫問者申飭使輅下頒慈詔仰銜優渥舉集驚榮恭以太皇太后仁孝惠和聰明睿智母儀后德輔導之力居多聖子神孫保育之恩殆至愴玉衣之如在瞻龍馭之已遙維時瑣才方尸大事豈謂伏蒙皇太后殿下哀思及遠聖慮發中頻加惠于具臣頓紆勤于長道尚圖微績少答殊恩

第二表

使華絡繹睿澤便蕃寵極自天震深臨谷伏念臣叨聯承粥首預勸防罔知行役之勞惟盡夙宵之慮方屬青



天煒煦黃道修除時無寒暑之侵衆無險易之利舊章具講大事行襄豈謂伏蒙皇太后殿下孝篤奉先恩隆逮下禮不以人而稍廢事繇有素而弗曾故沓惠于溫言俾各祇于能務

第三表

存屈使華嗣膺宸諭承命既渥撫躬靡皇伏念臣才匪適時任惟承乏屬因山之歲事叨奉駕以啓行下翔鳳之瑞闈風雲爲之變色過躍龍之間館道路莫不隕心方激中哀復推異數此蓋皇太后殿下念姑嫜始終之

大義有子孫付與之至恩愴自慈襟惻及多露惟誓糜軀之効上酬載物之私

謝皇帝撫問第一表

伏蒙聖慈以臣祇奉太皇太后靈駕在道特降中使傳宣撫問者使輶過至宸綽下臨仰體眷懷竊深榮懼恭以大行太皇太后功隆德盛善積慶長退處東朝之尊安享三宮之養不圖奄棄慈極遽卽僊遊方從車嬰之行未有夙宵之效伏蒙皇帝陛下堯仁多惻舜慕逾深詔發芝封已建因山之號歌流薤挽更勤陟屺之思載



矜將命之勞申錫徽光之渥撫存特厚啓處奚勝

第二表

星輶旁午宸綍丁寧恩宬禮隆感積驚至伏念臣叨膺  
聖選獲典厥儀屬先遠之告期集方中之祕藏望清洛  
山川之舊聽黃麾鼓吹之音瞻慕無窮哀號曷處豈謂  
伏蒙皇帝陛下有懷在外馳詔自中發明孝思旣惻星  
霜之變嗣傳使指又矜霧露之勞終自勉于寸愚庶靡  
墮于朝命

第三表

游發星輶曲頒宸指寵加典外愧浹情涯伏念臣偶緣  
聖知擢寘宰輔泣讀上賓之誥饗冠典喪之行望極霸  
陵不改山川之舊悲深慶壽更無歌舞之餘顧大事之  
甫襄敢羣志之弗勉豈謂皇帝陛下情隆送往恩眷庀  
司帝所深嚴時發鈞天之想王言溫厚更增陽谷之和  
雖內盡于單忠曷仰酬于洪造

謝賜生日表

伏以過被溫函特推異數省躬無似據寵爲憂伏念臣  
生雖逢辰學不貫道空玷累朝之遇徧躋近禁之聯屬



神睿之嗣隆勞肝宵而求治曾乏涓塵之益以培日月之華遽進被于制綸使預聞于國論且短材難給殆爲空位之人而舊物不遺曲記賤生之日出賜常于內府起殊觀于私庭此蓋皇帝陛下仁養衆賢禮優近輔何意衰齡之幸更叨嘉錫之榮誓永竭于孤忠庶少酬于鴻施

又

使馭趣臨俯闕于天檢私庭獲耀有駭于羣觀居靡自安思無以稱伏念臣學雖望道器不逮人徒邁會于文

明偶歷班于華近顧以孤忠之守荷于累聖之知方上德之日躋擢羣豪而時又過收舊物俾貳台司聖畧幾神曾乏涓塵之助素煒還律特旌犬馬之生此蓋伏遇皇帝陛下推君道之勤篤臣鄰之愛曲將異數施及微才茵鼎恩深誤被養賢之制桑榆景薄益堅報國之圖

又

詔使傳音遽闕于溫檢上臺將賜特厚于彝儀揣分過倫拊衷盈愧伏念臣志雖嚮古才匪濟時徒被顧于三朝偶預禪于大政懷鉛抱槧學本出于書生澤國芘民



術固慙于王佐候貫初商之序寵旌載育之辰論效何  
施饗榮尤異此蓋伏遇皇帝陛下仁均天覆美篤臣鄰  
舊物不遺以極遇賢之禮孤忠自守益深報國之圖

又

賜出上臺光生私室恩加典外愧溢情涯伏念臣本繇  
孤羈進值休盛得並畷賢之軌偶塵要近之班台慮必  
精雖勉百爲之務揆元經體莫裨萬化之成敢謂皇帝  
陛下濬發清衷曲存舊物均以弼疑之序旌其生育之  
辰飭使御以來臨被詔函而申獎禮將物腆祗貽竊位

之譏恩大報微空負蓋高之德

又

詔使甫臨遽頒于天語賜儀特厚增耀于家庭竊伏再  
思愧無以處伏念臣學雖稽古用不適時蚤辱三朝之  
知徧更二禁之直孤忠自信寸效莫施荷睿眷之過憐  
進台司而預政覲顏素食候驚五稔之移竭慮殫忠莫  
省一毫之補時涉初秋之序寵旌始育之辰此蓋皇帝  
陛下推賜予之蕃嚴禮貌之遇奚是瑣涼之質亦膺恩  
意之隆禮重褒賢不遺于舊物忠期報主願守于素心



又

申命使鑣肅將帝檢特推異數施及無庸據寵爲憂撫躬增愧伏念臣才無異衆幸有逢辰登累朝儒翰之班乏一言左右之助逮聖神之建統攬豪俊以乂民曾舊物之不遺繇近局而召用終鮮謀猷之獻空施夙夜之勞拙直一爲咎讒衆至被涵容之曲甚慙衰晚之未酬豈謂尚記始生過饗殊遇旣錫之牢醕又從以粟蕤賜出上臺榮生私室此蓋伏遇皇帝陛下厚遇賢之體嚴置輔之儀蓋禮本養賢昭發君仁之厚而義形報上敢

忘臣道之勤

又

秋煒還律方懷生育之慈使傳臨門遽被便蕃之賜寵加曲外愧溢情涯伏念臣偶以諸生進逢昌會歷朝班之通顯參國論之幾微寢誤倚求擢居丞弼恩隆効薄位愈進而愈驚任重責深勢彌危而彌懼況大明之溥照攬羣俊以翼成起修百度之新協應九功之序袞衣何闕曾無小補之施台鼎未調更竊大烹之享此蓋伏遇皇帝陛下隆馭邦之策嚴置輔之儀記皇念于始生



將賜儀之既渥觀雲需之象實豐飲食之頒歌天保之章惟上岡陵之報

又

恩記乃生禮優諸輔陳上臺之多賜動單族之殊觀惕然汗顏僂以承命伏念臣偶緣孤學寢誤聖知嘗參國論之餘遂正台司之陟方真人有爲之際蓋不世難遇之時仰皇德之日躋歎淺能之坐攸位隆三事已積空官之尤祿享萬鍾更虞浮食之誚不圖異數忽及茲辰此蓋伏遇皇帝陛下廣渥惠以賦賢推孝心而逮下特

表柄臣之遇奚勝私室之榮祿不逮于養親空懷永世之慕忠可移于事上何惜一身之捐

又

詔函甫暨臺饋申頒絕衡彌之異恩動里閭之殊觀伏念臣所懷蹇淺自奮羈單方少而孤每感劬勞之日其生也幸得遭熙盛之朝遂以區區投老之身而處赫赫具瞻之地預圖邦政固無經遠之謀式燕私門更誤養賢之禮此蓋伏遇皇帝陛下寵綏近辟丕冒庶工謂君臣同體則憂樂宜均而上下相求則報施爲重幣繒實



筐籠已厚于解衣餼廩盈庭愧有加于浮食敢不內竭  
朴愚之守上酬獎顧之深

又

誤奉明恩曲頒異數禮雖有舊分實踰涯伏念臣以羈  
單孤陋之資值希闊盛明之運親蒙聖拔遂翼政機以  
道事君有一心之死節非材當國幾衆毀之捐身方位  
重而憂深更寵加而禮至此蓋伏遇皇帝陛下舜孝誕  
敷堯仁丕冒記犬馬始生之日知有感于劬勞推君臣  
同體之心欲俯均于憂樂盤盂鏤器綺組織文將此實

筐之衣申以在垆之駟乾坤大施顧享之以不貲螻蟻  
微軀愧缺然而未報誓益殫于孤樸期少稱于甄明

又

使華洎館臺饋盈庭被聖造之異頒出朝彝之絕儼伏  
念臣生而踣蹇學至陋迂徒際昌時遂塵重任時髦並  
進方懷竊位之虞家食已豐更厚養賢之禮顧楨勤之  
何取祗冒寵以加慚此蓋伏遇皇帝陛下物徧德容時  
均澤及念邦政之大而不忘舊人之共屈帝辰之尊而  
特齒孤臣之生老且思親靡及奉牲之養忠而事上惟



堅填壑之圖

又

素籥環陰溫言發詔禮雖存于舊典寵實冒于等彝伏  
念臣本起諸生誤尸宰事有飭躬之一節無經國之大  
猷顧位重而多虞每恩深而自愧敢意始生之序洵饗  
異數之臨綺組光華盤盂雕錯念殘骸之未泯旣頒御  
府之衣念駑駕之不前更錫天閑之駟周旋被患踧踖  
無容茲蓋伏遇皇帝陛下廣天覆之仁篤臣鄰之愛靡  
問職勞之薄有加賜式之蕃祿不逮親追極桑弧之感

心惟許國誓殫犬馬之勤

又

使璫傳命賜篚生華奉瞻踰倫溢情知愧伏念臣謨蒙  
聖獎登備宰司舉無軼于衆材居莫勝于大務驚炎涼  
之寢易加筋骨之向疲進無以贊非常之功退不敢懷  
自安之計未離曠斥實賴保全何意始生之辰更有異  
等之澤此蓋伏遇皇帝陛下推厚賢之禮廣存舊之風  
豈獨重一時之恩亦將爲庶位之勸迨及庸陋大蕃寵  
休茵鼎承榮顧念親之匪逮岡陵歸福思報上以何窮



又

歲籥環陰方結劬勞之感使貂泊館特持賜予之優揆稱無容循涯自愧伏念臣謬奉神簡叨陪政機當難遇之盛時專久孤之樸守聖躋功就既高二帝之行器狹任隆終鮮一塵之助正懼空官之責何勝異數之加茲蓋伏遇皇帝陛下申眷近司停修故事厚其幣帛得盡鹿鳴之誠壽如岡陵敢忘天保之報

又

寵光下濟餼廩申頒荷聖造之生成優輔臣而飫賜伏

念臣生而孤蹇少也賤微獲際昌期久塵里任鼎司濫處方懷覆餗之憂家食已豐更玷養賢之禮此蓋伏遇皇帝陛下堯仁溥及湯德兼容道並乾坤澤均雨露記犬馬始生之日品雖下而不遺推君臣同體之心感至深而難報幣繒充篚饗饋盈庭戴厚意以戰兢省素餐而勉勵腥必熟而薦獻恩罔極于劬勞惟堅移孝之誠庶有顯親之效仰酬洪覆敢惜餘生

又

詔函俯及禮數優加受寵若驚冒榮爲懼伏念臣遭逢



盛旦寢服近司雖愚樸之內殫在經綸而何補敢圖生  
日併辱殊恩綺組光華盤盂雕錯笥衣出賜衰微不稱  
于身章廡乘分頒勉強自慚于駑力斯蓋伏遇皇帝陛  
下大明均照圓蓋推仁不以具臣畧其舊典方劬勞之  
未報加錫賚以逾涯祿不逮親念桑弧而增感心惟許  
國異芻狗之無知仰答洪慈誓堅素節

又

溫厚溢言便蕃加式屈王人而臨諭耀私室以增榮伏  
念臣蚤誤時恩久襄宰事奉令承教敢遑終食之間經

體贊元未効秋毫之末每退循于蹇淺恐終累于休明  
豈謂矜寬申加寵賚叨榮雖異揣稱奚聞且致養之勤  
悲莫深于弗洎而揚名之美忠自信于能移誓竭翠翬  
之思少致拳拳之義

又

寵私未懲蕃錫有加徒知拜貺之榮孰識論酬之所伏  
念臣少承緒業初乏遠猷會逢聖運之開登備宰司之  
曠已侵尋于歲月無補報于涓埃況在循名責實之時  
尤難當軸處中之任乃瘵厥位以忝所生寬慈未卽于



明誅寵獎更叨于異數想象桑弧之設指景難追咨嗟  
蕭露之濃捫心獨感此蓋伏遇皇帝陛下以大明旁燭  
以盛德兼容謂操柄以馭臣宜致誠而加禮意有鹿鳴  
之厚敢不盡心美同天保之歸庶能報上

又

王人甫暨帝賚有加品物在庭恩光動室伏念臣持孤  
愚之守偶盛大之期顧當蒲柳之衰年尚竊機衡之重  
任曾無裨補猶冒休華寶詔發函曲記載生之日大官  
第式更陳多錫之儀僂以自思藐無足稱斯蓋伏遇皇

帝陛下楸優賢之寵衍推食之慈雖舊典之按行蓋宸  
心之過軫蕭然白首豈忘負米之貧歛爾餘陰敢後捐  
軀之報

又

曲膺天獎洊降詔文拜賜之優以榮爲懼伏念臣寢繇  
孤學詔冠近司空殫歲月之勞曾鮮毫釐之補久願還  
于重柄庶少厭于浮言仰識矜憐未行能免載臨流火  
之序猶念射蓬之辰珍幣盈庭加錫衣于賜篚寶鑣照  
路下駿足于天垓敢以無能頻然當此茲蓋伏遇皇帝



陸下仁侔乾施體厚臣鄰禮以養賢爲先事不因人而  
廢顧茲寵異屬在衰遲志欲養親靡及南咳之戒忠于  
報上願輸天保之勤

又

敕使踵門曲諭褒言之縟大官庇物載申異禮之蕃荷  
寵過庸臨淵加懼伏念臣蚤躬樸學浸歷近班濫持守  
于鈞衡謾侵尋于歲月贊元經體實負素餐當軸處中  
有孤羣望適九秋之肇序方六射之甫期猥加臺餽之  
儀特畀天厨之品餼牽豐碩蓋使識自養之榮醪酒旨

清又將蒙旣醉之福惟是深仁之難報曾何飫賜之足  
勝此蓋伏遇皇帝陛下體貌嚴于輔臣匪頒厚于拜式  
隆漢家推食之惠增周雅錫朋之休生有至恩不及承  
頤之養晚圖一節惟堅事國之忠

又

聖言如綍有溫厚于芝函拜賜自天發光華于部室榮  
踰素望媿溢常涯伏念臣以固陋之資被睿神之眷迺  
預塵于政路復冠列于台司歲月崢嶸而屢更精力勤  
勞而莫補速譏讒于衆口媿功烈于前人逮茲苟完安



有橫冀載及桑蓬之序方深帖吧之思念莫報于劬勞  
敢饗承于恩禮良金燭乘嚴寶勒于天駒藻帛綯文雜  
華章于笥服豈繫蕃庶併及衰遲此蓋伏遇皇帝陛下  
敦舜孝以儀民軫堯仁而冒物特厚柄臣之遇過頒御  
府之珍交孚曲記于賤生博愛乃容于濫賜漢庭拜寵  
雖慙稽古之工周雅有章願上如剛之壽

笏記

謝宣召赴集英殿乾元節御宴笏記

伏以鳴社膺期值南訛之司籥需雲錫宴崇萬壽以稱

觴恭惟皇帝陛下躬上聖之姿紹中天之命德符炎歷  
早開大電之祥歡浹朱鄰普慶南山之祝矧預秉鈞之  
冠更榮在鎬之逢舉樂皇恩永肩孤瘁

謝賜生日禮物笏記

伏蒙聖慈特差臣男秘書著作佐郎充崇文院校書某  
押賜臣某生日禮物者茂膺睿眷擢預台司載履始生  
之辰曲被至優之賜誓堅忠節期報鴻恩

謝賜年節御宴笏記

伏蒙宸慈特降中使賜臣某等年節御宴者伏以春元



更煦君燕示慈樂及喜辰榮深近輔茲蓋皇帝陛下仁均天施禮厚臣鄰適臨獻歲之和特啓需雲之會誓肩一節申答殊私

又

伏以氣更年籥燕示天慈歡屬盛期寵申近輔茲蓋皇帝陛下義深同體德廣爲春特加折俎之儀使預登臺之樂仰銜厚遇永厲丹衷

謝宣召赴紫宸殿御宴笏記

伏以燕示帝慈歡修鄰好拱宸旒而在望挾朝禮以知

榮恭惟皇帝陛下仁浸物生功參天令一元施統適更鳴律之酥萬玉來庭特侈需雲之會臣等親逢盛際冒服近班仰涵君賜之深永厲臣愚之報

謝宣召赴集英殿春宴笏記

伏以春籥敷和載歌羣物之林帝庭命享遂合諸臣之歡恭惟皇帝陛下德與古躋事因時講備樂所以昭禮加鼎所以示慈臣等參列台司首塵君召徒樂宴私之飫莫知涓露之酬

中書謝春宴笏記



伏以春物喜華宸居暇豫中開宴賜下逮臣工伏惟皇  
帝陛下盛德對時至仁自性弗爲獨樂務與衆均臣等  
備位在廷逢辰多慶畧無報稱第有戰兢

謝賜上巳瓊林苑御宴笏記

伏以禊屬芳辰燕班別籩飲盛華林之集歌同沂水之  
行臣等參柄近司預榮勝會雖盡臣忠之瘁匪疇君賜  
之隆

謝參知政事笏記

伏奉制命特授臣參知政事祇奉渙恩伏深兢素伏念

臣早以末學邁于盛期進領代言之司已妨賢路參謀  
論道之府何補聖猷茲蓋伏遇皇帝陛下求士不厭其  
勤用人不責其備致未捐于舊物且特置于近僚敢不  
上體至懷內堅孤守益廣衆功之美少酬鴻施之私

賀皇子延安郡王侍宴笏記

元豐七年三月

適得閣門告報延安郡王今日出侍大宴者伏以玉宸  
侍宴帝子承顏上慰聖神之情大爲邦國之慶



華陽集

卷十二

三  
王朝倍校

華陽集卷十二





